

輿地紀勝

七

宋元地理志叢刊

(宋)王象之・撰

李勇先・校點

四川大學出版社



興地紀勝

卷之二

興地紀勝

興地紀勝



輿地紀勝

七

宋元地理志叢刊

(宋)王象之·撰

李勇先·校點



四川大學出版社

責任編輯:莊 劍 徐聞文 熊 志
責任校對:王大用 洪 滔 杜 偉 李文傑
責任印制:楊麗賢

圖書在版編目(CIP)數據

輿地紀勝校點 / (宋) 王象之原著; 李勇先校點.
成都: 四川大學出版社, 2005.10

(宋元地理志叢刊)

ISBN 7-5614-3250-X

I. 輿... II. ①王... ②李... III. 歷史地理-中國
-宋代 IV. K928.644

中國版本圖書館 CIP 數據核字 (2005) 第 111031 號

書名 輿 地 紀 勝

作 者	[宋]王象之 原著 李勇先 校點
出 版	四川大學出版社
地 址	成都市一環路南一段 24 號 (610065)
發 行	四川大學出版社
印 刷	成都東江印務有限公司
成品尺寸	140 mm×202 mm
印 張	212.625
字 數	4100 千字
版 次	2005 年 10 月第 1 版
印 次	2005 年 10 月第 1 次印刷
定 價	980.00 圓(全十冊)

版權所有◆侵權必究

◆讀者郵購本書,請與本社發行科
聯系。電 話:85408408/85401670/
85408023 郵政編碼:610065
◆本社圖書如有印裝質量問題,請
寄回出版社調換。

◆網址:www.scupress.com.cn

輿地紀勝卷第一百十二

柳州

羅池 柳城 象縣 隴江 柳江 龍城

【州沿革】

柳州，下。龍城郡，軍事。《九域志》。古百越之地。《輿地廣記》。牽牛、婺女之分野。《圖經》引《漢志》云：「粵地，牽牛、婺女之分野。」秦平百越，屬桂林郡。漢改桂林爲鬱林郡。又爲鬱林郡之潭中縣地。《寰宇記》。自吳分鬱林爲桂林郡，又爲桂林郡之潭中縣地。《晉志》、《南齊志》桂林郡下並有潭中縣。梁置龍州。張維《廣西郡邑志》云：「梁大同三年，八龍見于江，乃即江南置龍州及龍城縣。」隋廢龍州，《廣西郡邑志》云：「初置州在三江南，隋開皇初徙置江北。尋廢州。」以馬平縣置象州。《元和郡縣志》：「隋開皇十一年（二），廢象郡及中溜、潭中二縣，改潭中縣爲桂林縣，置象州。」煬帝廢象州爲象

縣，屬始安郡。《隋志》始安郡下有象縣。唐平蕭銑，以始安郡之馬平縣置昆州，新、舊《唐志》在武德四年。尋更爲南昆州，新、舊《唐志》亦在武德四年。領馬平、新平、文安、賀水、歸德五縣，改歸德爲修德，文安爲樂沙，以賀水屬澄州。並在武德四年〔二〕。又省樂沙入新平，以廢龍州之龍城縣來屬。《圖經》在正觀七年。改南昆州爲柳州，《唐志》正觀八年。以當柳星之下。《郡國志》。又置崖山縣，正觀九年。省新平入馬平。正觀十二年。後省崖山，以修德隸嚴州，以桂州之象縣來屬，又置洛封、洛容縣〔三〕。《唐志》云：「正觀中置。」改龍城郡，天寶元年。領縣五。《龍城志》云：「五縣曰馬平、龍城、象縣、洛容、洛曹。」復爲柳州，乾元元年。更洛封曰洛曹。元和末年。唐末爲湖南馬氏所有。《通鑑》：「唐昭宗光化三年，馬殷悉平嶺北，引兵趣桂州，靜江軍節度使劉士政出降，而桂、宜、嚴、柳、象五州皆降於湖南。」五代後周時陷于南漢。《通鑑》：「後周太祖廣順元年，南漢主遣將吳懷恩以兵略定宜、連、梧、嚴、富、昭、柳、象、龔等州。」皇朝平嶺南，地歸版圖。《通略》在開寶三年〔四〕。以洛曹隸宜州，淳化元年〔五〕。改龍城爲柳城，景德三年。省象縣入洛容。《九域志》在嘉祐四年。今領縣三，治馬平。

【縣沿革】

馬平縣 中

倚郭。《舊唐志》云：「州所治也。本漢潭中縣地，屬鬱林郡。隋置——。武德四年，於縣置昆州，又改爲柳州也。」《輿地廣記》云：「吳分屬桂林郡，後置——及郡。隋廢郡入象州。煬帝時州廢，屬始安郡。唐立昆州，後改曰柳州，縣亦屬焉。今爲州郡之治所。」

洛容縣 中

在州西北百二十里〔六〕。《寰宇記》：「本漢潭中縣地。」《唐志》：「正觀中置——〔七〕。」《九域志》：「嘉祐四年，省象縣入——。」

柳城縣 中

在州西北八十里。《皇朝郡縣志》云：「本漢潭中縣地。」《隋志》云：「梁置龍城縣。」《唐志》云：「武德四年，置龍州，并置柳嶺縣。正觀七年，廢龍州，省柳嶺縣，以龍城縣來屬。」《九域志》云：「景德三年，改龍城縣爲——。」

【羈縻州】二

思順州

本名嵯峨鎮。唐儀鳳二年〔八〕，土戶首領洛光焚等上表乞置州額，其年賜額爲——。

歸化州

本名郎倉峒。唐儀鳳二年，陸元積奏請爲州，其年賜額爲歸化。

〔風俗形勝〕

柳州，古爲南夷。子厚《柳州孔子廟碑》：「椎髻卉裳，攻劫鬪暴。」父老相告語，莫違侯令。昌黎《羅池廟記》。柳侯爲州，不鄙夷其民。昌黎《羅池廟記》。嶺南登科自柳州甘翔始。《龍城圖志》：「翔景祐元年張唐卿榜。」進士輕千里之遊。柳宗元爲刺史，南州爲進士者走數千里，從宗元遊，經指授者爲文詞皆有法。出相弟長，入相慈孝，以爲柳河東教化之及。《龍城圖志》：「地近桂林，號無瘴，且山水清曠，中朝名士如王初寮輩嘗避地寓居，耳濡目染，或者恥於爲非。韓碑言云云。其所由來者遠矣。」命守遐壤。柳文《平淮雅表》注：「謂宗元爲柳州也。」柳州名重於他郡，以子厚故也。《郡守題名序》。柳雖古荒服，而實連湖湘，風俗與全、永間不相遠。《圖經·風俗門》。蠶不能帛，率以爲績。同上。郡產不死草木，食之令人多壽。《圖經》云：「今俗謂之不死草。」武陽小魚大如針，一

斤千頭。《圖經·水族門》。候蟲異於他所。《圖經》：「————，時窮冬〔九〕，促織猶鳴。」兩過南宮，鴈行侍從。《進士題名》載：「柳有巷談『————』，蓋言其邑里之盛，爲張亞卿、王之才登科設也。」絃誦爲嶺南諸州最。大觀中，士之絃誦者至二百人〔二〇〕，爲嶺南諸州之最〔二一〕。汪藻《學記》。越地物產，絕於天下。曾鞏《送李柳州材叔序》云〔二二〕：「越地物產之美，有荔子、龍眼、蕉柑、橄欖，花有素馨、山丹、含笑之屬，食有海之百物，累歲之酒醋，皆絕於天下。」以州界柳嶺以爲名。《寰宇記》及《元和郡縣志》云：「以柳嶺爲名。」山石奇秀，平地忽崛起數百，韋曲、鄠杜蓋無之。《龍城圖志序》。自唐以來，多着遷客，山哀浦思，翰墨具存。《龍城圖志序》。

【景物上】

東亭。在就日門外。柳子厚有記。南樓。《龍城志》云：「譙樓也，摹鄂州張安國『——』大字榜之。」釣軒。在報恩寺前，對立魚石，故名。龍江。同上。源出宜州，會于柳。龍壁。陶弼詩云：「曾看柳侯《山水記》，信知——好煙霞。誰能寫作新屏障，寄與長安富貴家。」馬平。《龍城圖志》：「柳州治——縣。」象縣。《寰宇記》云：「漢潭中縣地，唐正觀中置。」《元和志》云「陳置——」，不同，當攷。鵝山。在馬平縣西十里。山嶺有石，狀如鵝，故名。

鵝水出焉。靈溪。同上。靈溪寺前有泉，如車輪，渚而爲池，每日潮湧，盈縮者三，未嘗愆期。靈泉。在水南之魚山。山水暗流爲湫。聖山。通雷塘，在柳城縣南五里。甌山。在馬平縣東南一里。如甌。屏山。在馬平縣東南一里。其山方正類屏，故名。陶弼詩云：「一峰高起塞天關，堪作皇家外屏山。可惜化工安着遠，半遮中國半遮蠻。」潯水。柳文〔二〕：「柳州山水近治可遊者。」記云：「古之州治，在——南山石間，今徙在水北。」雙山。北有——夾道，嶄然曰背石山〔二四〕。柳城。《廣西郡邑志》：「景德中，更龍城以爲柳城。」柳水。一名潯水。源自牂牁，出辰、沅，經融州西北一百里，曰龍水；北八十里，曰古清江；南十五里，曰三江；東五十里，曰桂江，東會于郡，又東過潯、藤，至廣州入于海。雷塘。在水南，距城七里。四壁高山，巖穴黝黑，神靈所憑。直下有潭，無底。遇旱，沈以牲幣，能興雲致雨。新洞。在郡水南十里。洞可坐百客，石乳融結，奇怪如人物者不一。有穴，上燭天〔二五〕。潭水〔二六〕。賀水。《寰宇記》云：「在洛容縣。」羅池。唐柳宗元貶爲刺史，死三年，神降于州之後堂，部將歐陽翼見之，其夕夢翼而告之曰：「館我於——。」即此也。秀石。柳子厚《山水記》。蛆草。高二三尺，狀如茅。夏月插一枝盤筵中，蚊蠅不近，食物亦不速腐。

【景物下】

清心堂。在郡治。平理堂。在郡治。無倦堂。在郡治。觀風樓。在郡之東。柳星樓。在郡治。待蘇樓。在郡治。思柳亭。在就日門外。陶弼詩云：「羅池刺史寡塵緣，畫戟牆頭築望仙。黃鶴與誰同一去，碧桃無主又千年。」思柳堂。在郡治。延桂閣。即郡城門。後改延桂。翠微亭。在水南報恩寺後。明秀堂。在郡治。王初寮扁堂，中龕石刻甚富。望仙閣。以前揖仙人山，故名。希隱亭。舊在報恩寺左。柑子堂。有黃柑二百株，世傳子厚所種，詩碑猶存（二七）。羅池亭。政和二年，太守朱輅始刻柳侯像於其中。紹熙二年（一八），太守涂四友徙故基，左築新亭，館侯于方丈，高明閎麗，得江山之勝。立魚山。在馬平縣。狀如植鱗。下有巖，巖出靈泉，甘而冽。駕鶴山。在馬平縣。傍臨大江。《山水記》謂：「其山壯聳環立，古州治負焉。有泉在坎下，常盈而不流（一九）。」龍崗山。《寰宇記》云：「在洛容縣。」龍跡寺。距州西南，居山澤之間，峰巒峭拔，湍流涌激。父老傳石上有龍掣痕，故名。蜈蚣珠。蜈蚣有極大者，柳州種柑堂（二〇），頃年夜有光出柱上蠹穴中，滿堂如月。剔視，見鱗甲大如鏡。太守知異物，集吏卒持斧鋌齊刺之，有聲砉然（二一），血迸流地上。破柱，乃大蜈蚣，長竟柱。腦中得珠，如鵝卵，圓走盤光，遂不見。外臺索之，太守不與。興獄，守死。其子憤，鑽穴之。外臺不復索，賣在民間。獅子崗。在柳城縣北二里。勢如獅子，故名。犀角山。《寰宇記》云：

「在洛容縣。」馬鞍山。在柳城縣東一十里。觀音寺。在柳城縣南五十步。壯麗爲柳州之冠。觀音巖。在柳城縣。西北相通。西有臨西閣，北有丹霄亭，內有石田、石盆地。巖東有會仙巖，中有仙人跡、煉丹爐竈。如來山。在洛容縣南。《舊經》云：「有神女顯（三三），故名。」仙人山。《九域志》、《寰宇記》並云有石形如仙人。仙弈山（三三）。《龍城圖志》：「《山水記》云：『山之西有穴，穴有屏，有室，有宇。始登者，得石枰於上，黑肌而赤脉十有八道，可弈，因名。』」會仙巖。在洛容縣西十里。中可坐數十人（三四）。巖下有潭水，中多怪石。靈泉寺。在州南岸三里仙弈山，立魚山之中。紹興丁巳，改爲報恩。有翠微亭，崖石刻王初寮詩碑。靈溪寺。在靈溪。壽聖寺。舊名龍泉寺，距城西南一百十里。有山曰卧龍，中有石室，流乳如人形。下有泉，曰龍泉。烏蠻山。在柳城縣南五里，臨大江。下有潭水，湛而深。白露水。《寰宇記》云：「在洛容縣。」銅盤山。《寰宇記》云：「在洛容縣。」筌篴山。在馬平縣南三里。落艷水。《寰宇記》云：「在洛容縣。」湧珠泉。在柳城縣之西七十里洛好市。自地湧出，市民汲飲。犀角山。《寰宇記》云：「在洛容縣。」降蠻山（三五）。《寰宇記》云：「在洛容縣。」雲蓋山。在柳城縣東三十里。高大壯聳，雲霧嘗滃鬱覆其上，故名。西巖山。在柳城縣。

【古迹】

故象縣。《象郡志》云：「隋置象郡。」《隋志》於陽壽縣下注云：「舊有象郡，平陳時廢。」《元和志》云：「陳於今縣南四十五里置象郡。開皇九年，廢郡爲縣。總章元年，割屬柳州。」《九域志》云：「嘉祐四年，省象縣入洛容縣。」柳文惠廟。柳宗元爲刺史，將卒，謂歐陽翼令館於羅池。韓愈記其事，其碑存。郭祥正詩云：「種柳江邊不得歸，歿將靈魄寓羅池。名參韓子猶爲幸，黨人王生最可悲。」《繫年錄》云：「紹興二十八年，加封文惠昭靈侯。」劉賢良廟。公諱賁。對制策，貶柳州之戶曹以卒。郡侯許尹請于朝，爲立廟。雷塘廟。柳子厚《山水記》謂：「雷山兩崖，雷水出焉，能蓄雲氣，作雷雨。」趙矜墓。矜，河南人，國子祭酒宏安之曾孫也。舉明經，歷襄陽丞，客死柳州，官爲斂葬。後十七年，子來章始壯，自襄陽往求其喪不得，野哭，再閱旬，卜人秦詡爲筮曰：「金食其墨，而火以貴，其墓直丑，在道之右。南有貴神，冢土是守。宜遇西人，深目而髯，乃其得實。」明日，有老人過其所，問之，得矜墓，直社北，遂歸葬宏安墓次。人哀來章孝，皆爲出涕。《唐書》。

【官吏】遷客寓客附

柳宗元〔二六〕。字子厚。唐元和末爲刺史。韓文公《廟碑》云：「柳侯爲州，不鄙其人，動以禮法，民皆自矜奮，莫敢違侯令。」又云：「侯棄於時，而寄於此。」劉賁。《唐書》本傳：「賁以對策直言下第，令狐楚、牛僧孺表之入幕府，竟爲宦人所嫉誣〔二七〕，貶柳州司戶。」李商

隱贈詩云：「漢庭急詔誰先入，楚路高歌自欲翻。萬里相逢歡復泣，鳳巢西隔九重門。」及賁卒，後以二詩哭之曰：「一叫千回首，天高不爲聞。」又曰：「已爲秦逐客，復作楚冤魂。併將添恨淚，一灑問乾坤。」田欽祚（二八）。太平興國八年爲守。《九朝通略》云：「開寶三年，契丹以六萬騎寇中山，上遣欽祚以三千兵赴之，與敵接戰（二九），自旦至晡，殺獲甚衆。值暮，入保遂城，敵圍之數日，欽祚整衆突圍而去。至保塞軍，軍中不遺一矢，北邊傳言三千打六萬。」畢君卿。三山人。郡先無城，公爲版築，柳有外城自畢始。元祐四年。常同。《邛州志》云：「元祐二年作守。」許尹。鄱陽人。紹興十四年爲守，增修學宮，奏置教授，立劉賢良祠。汪藻有《建學記》。王安中。字履道。居北岳（三〇），號初寮道人。建炎初，避地于郡，與吳少宰、汪丞相、折樞密遊。得郡人熊氏園，植桃數百本，號「小桃源」。折彥質。開封人，號葆真居士。建炎間謫居。劉洪道。《中興遺史》云：「洪道，山東人。岳飛辟洪道爲參謀。飛死，洪道責柳州卒。」

【人物】

白聳（三一）。郡人也。唐爲義勝都將。光啓三年，蘇日朝寇郡境，盡驅其民，掠其財帛。公率所部敗賊，奪而歸之，邦人爲之立祠。宋士堯（三二）。馬平人。儂智高寇廣南，公領兵至邕州城下，極力與戰，斬首略相當。已而敗北，賊斷其首，屍不肯仆，猶犇馬以還。後以子貴，

贈屯衛大將軍。甘翔。景祐元年張唐卿榜，官至朝散大夫，爲嶺右擢第之始。張亞卿。種學績文，瀕老不衰〔三三〕。皇祐元年，嘗擢第，廷對見黜，後不預計偕。郡守鮑安上奇其才，以遺逸薦於朝，五年鄭獬榜中第。

【仙釋】闕

【碑記】

柳州文宣王新修廟碑。柳子厚文。黃柑堂碑。在黃柑堂。柳子厚所題，詩刻今存。乾明寺碑。柳子厚來刺是邦而建，寺有碑。東亭記。前人〔三四〕。大雲寺碑〔三五〕。柳宗元文〔三六〕。碑見存。柳州山水記。前人〔三七〕。柳侯遺碑。學有夫子廟碑，蓋子厚親筆，久仆無聞。淳熙己酉，太守趙彥禮復得舊斷碑并蓋於學宮草莽間〔三八〕，遂龕於郡治明秀堂。羅池廟碑。韓文公作。《集古錄》云：「長慶元年立。」靈泉寺磨崖碑。王安中。重修學記。汪藻〔三九〕。

【詩】

手種黃柑二百株，春來新葉徧城隅。方同楚客憐皇樹，不學荊州利木奴。幾歲開花聞噴雪，何人摘實見垂珠。柳宗元。柳州柳刺史，種柳柳江邊。談笑爲故

事〔四〇〕，推移成昔年。垂陰當覆地，聳幹會參天。好作思人樹，慚無惠化傳。柳宗元。宦情羈思共悽悽，春半如秋意轉迷。山城雨過百花盡，榕葉滿庭鶯亂啼。柳宗元《柳州二月》。梅嶺寒煙藏翡翠，桂江秋水露鰐鱗。柳宗元。郡城南下接通津，異服殊音不可親。青箬裹鹽歸峒客，綠荷包飯趁虛人。鵝毛禦臘縫山罽，雞骨占年拜水神〔四一〕。柳宗元《柳州峒氓》詩。仙山不屬分符客，一任凌空錫杖飛。柳宗元。林邑山聯瘴海秋，牂柯水向郡前流。勞君遠問龍城地，正北三千到錦州。前人。祇應長作龍城守，剩種庭前木槲花。柳宗元。桂州西南又千里，灘水鬬石麻蘭高。柳宗元《寄韋珩》。林邑東迴山似戟，牂柯南下水如湯。柳宗元。崩雲下灘水，劈箭上潯江。柳宗元。海畔尖山列劍鉞，秋來處處割愁腸。柳宗元。聖代提封盡海壖，狼荒猶得紀山川。《華夷圖》上應初錄，《風土記》中殊未傳。柳宗元《南省轉牒令道風俗故事》。瘴江南去入雲煙，望盡黃茆是海邊。山腹雨晴添象跡，潭心日暖長蛟涎。柳宗元《嶺南江行》。城上高樓接大荒，海天愁思正茫茫。驚風亂飈芙蓉水，密雨斜侵薜荔牆。嶺樹重遮千里目，江流曲似九回腸。共來百越文身地，猶自音書滯一鄉〔四二〕。柳宗元《登柳州城樓》。荒山秋日午，獨上意悠悠。如何望鄉處，西北是融州。柳宗元《登峨山》

詩：「融州在柳州北三十里。」寄書龍城守，君驥何時秣。韓退之《寄元十八協律》詩，謂子厚也。唐室衣冠四百秋，元和臺省盡名流。誰人肯爲交朋死，乞以羅池換播州。陶弼。黃柑無樹井無泉，思柳亭中兩愴然。蠻越至今猶畫像，聖唐何事獨遺賢。陶弼。子厚才名甲有唐，謫官分得荔枝鄉。羅池水盡黃柑死，獨有空碑在畫堂。陶弼《柑子堂》。人說羅池表歲功，深爲豐稔淺爲凶。陶弼《羅池廟》詩。注云：「皆作正旦占也。」鵝山夏曉雲漫郭，龍壁春陰水抹川。陶弼。世事少陵詩外見，人煙子厚記中行。〔四四〕。吳敏〔四五〕。回首風光橫萬里，他年應記柳侯城。吳敏。莫學柳儀曹，讀書教蠻獠。坡詩〔四六〕。儀曹，唐禮部郎。

〔四六〕

龍城屬部，象縣分封。李義山《四六集·柳州牒》。眷龍城之小邦，有唐賢之遺化。《會元》。山兼象縣，江帶龍城。李義山爲《鄭郎中謝上柳州表》。